

Թավրիզի, Նախիջևանի, Երևանի գրավումը. բ) օսմանյան բանակի հակահարձակումը, պարսից նահանջը և դրա հետ միաժամանակ մեծ բռնագաղթը. դ) ղըզլըբաշների հետագա նվաճումները»¹³:

Բովանդակային մյուս սևեռումը հայոց կաթողիկոսների գահակալման ու նրանց գործունեության պատմությունն է, որն իր հերթին ներքին տարածքում բաժանվում է երկու մասի: Առաջին մասը ներկայանում է իբրև կորուստների ու ավերումների, իսկ երկրորդը՝ վերածնության ու զարթոնքի շրջան: Հենց այս հանգամանքը նկատի ունի Աշոտ Հովհաննիսյանը, երբ գրում է. «Հատկանշական է, որ... Առաքել Դավրիժեցին գրում էր այդ դարի (17-րդ-Ա.Ն.) առաջին քսանհինգամյակի պատմությունը որպես հայոց աշխարհի և էջմիածնի **ավերման** պատմություն, դարի երկրորդ քսանհինգամյակի անցքերը նա շարադրում էր որպես հայոց աշխարհի և էջմիածնի **նորոգման** պատմություն» (ընդգծումը բնագրում-Ա.Ն.)¹⁴: Մանուկ Աբեղյանը, զանց չառնելով պատմական ճշմարտությունը, դա բացատրում է նաև այն հանգամանքով, որ Դավրիժեցին իր պատմագիրքը գրել է երկրորդ շրջանի կաթողիկոսների հանձնարարությամբ, և ինքն էլ, ի վերջո, այդ սերնդի ներկայացուցիչն է¹⁵:

Այս ամենը վկայում են, որ «Գիրք պատմութեանց»-ը բովանդակային հարթության մակարդակում ներկայանում է թե՛ գաղափարական զարգացումների, և թե՛ պատմագիտական պահանջների թելադրանքով ու միասնականությամբ:

¹³ **Լորենտա Դանեղյան**, Առաքել Դավրիժեցու երկը որպես Սեֆյան Իրանի XVII դարի պատմության սկզբնաղբյուր, էջ 48:

¹⁴ **Աշոտ Հովհաննիսյան**, Դրվագներ հայ ազատագրական մտքի պատմության, գիրք երկրորդ, Երևան, 1959, էջ 121-122:

¹⁵ Տե՛ս **Մանուկ Աբեղյան**, Հայոց հին գրականության պատմություն, գիրք երկրորդ, էջ 455-456: